



partii naleraq

24.maj 2016

UPA2016/64

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit inatsisartut inatsisaata nr. 16, 3. December 2012- imeersup allanngortinneqartariaqarnesoq pillugu apeqquteqaat aallaavigalugu oqallinnissamik siunnersuut. Meeqquvinni meeraaqquvinnilu pisortat allaffissornerujussuarmik suliaqarnerisa oqilisaaffigineqarnissaat qanoq ilillugu oqilisaaffigineqarsinnaava ? (Inatsisartunut ilaasortaq Anthon Frederiksen, Partii Naleraq).

Inatsisartunut ilaasortaq Anthon Frederiksen Partii Naleraq oqallisissiamik saqqummiussaqqarpoq tassalu meeqqanut suli atualinngitsunut perorsaanikkut inerikkiartuutaasunik inatsimmut tunngasunik allanngortitsisoqarsinnaanersoq tamannalu Partii Naleqqamiit oqaaseqqarfigissavarput.

Meeqqanut ukiortitaq 2016 atuuttoq sukku sumilu misigissavarput meeqqat ukiorigaat? Tassami massakkumut suli malunnartumik meeqqat ukiuat pillugu annerusumik meeqqanut tunngasunik misigisaqanngilagut, aammalu qanoq meeqqat atukkamik alloriarnersut? Tassami massakkumut inatsisartuni meeqqanut suliaassat massakkumut eqqartorneqartartut eqqaassanngikkanni.

Meeqqanut suli atualinngitsunut perorsaanikkut periarfissat sapinngisamik pitsaasumik atugassaqqarfiullutik, aammalu sullinneqarnikkut sulisoqarnikkullu isumannaatsumik atugassaqqarfiullutik ingerlanneqarnissaat Partii Naleqqamiit allatulli pingaartikkippat oqaatigissavarput.

Meeqqanut suli atualinngitsunut atugassarititaasut meeqquvinni allanilu pitsaasumik ingerlanneqarnissaat inatsimmik tunngavilimmik illersugaavoq, ajoraluartumillu inatsisip tamanna tamakkiisumik qulakkersimangilaa pingaartumik sulisussaqqarnikkut sulisoqarnikkullu pissutsit aammalu meeqqat suliniarfigineqarneranni init pisariaqartinneqartut meeqquviusinnaasut ilaatigut amigaatineqartarmata pingaartumik nunaqqarfiit eqqarsaatigalugit.

Sulisqqarnikkut ilinniarsimasunik amigaateqqarnerput ilisimavarput, taamaakkaluartoq sulisut ilinniarsimasut tamakkiisumik atornagit ilaatigut allaffissornikkut sulinermut atorpagut tamannalu nalilersortariaqqarpoq. Mannalu oqallisissiaq meeqquvinni sulisut ajornartorsiutaannik tunngaveqqarmat sulisullu namminneq oqariartuutigisarmassuk paaseqqunaqaaq.

Perorsaanermik ilinniagallit isumaqarluinnarpugut tamakkiisumik ilinniarsimasatik atortariaqaraat tassalu meeqqerivinni suligunik taavalu meeqqanut sullississasut imaangitsoq allaffimmi suliassat tamakkiisumik suliarissagaat, taakkummi allaffimmiutut ilinniarsimasunik suliarineqarsinnaapput suliarineqartariaqarlutillu.

Taamaattumik ilanngullugu nalilersorneqassasoq kissaatigaarput ilumut meeqqerivinni pisortat aamma allaffissornikkut sulissanersut, tassami sulisunik ilinniarsimasunik amigaateqarpugut taakkulu sulisut ilinniarsimasuutigut sunniuteqarluassappata taava ilinniagaannut sangutinneqartariaqartut isumaqarpugut.

Aammalu meeqqat suli atualinngitsut perorsaanikkut inerikkiartuutaasumik sullinneqarnissaat pitsaasuussappata taava aamma avatangisai pitsaasuusariaqarput, taamaattumik aamma meeqqat parineqartarnerini illuutit amigaatigineqartut pingaartumik aamma nunaqarfinni pilersinneqarnissaat ilungersuuttariaqarpoq inatsisiliorsinnaanngilagummi meeqqat ilaannaannut atuuttussanik sumiiffiit allat puigorlugit.

Isumaginnittoqarfinni sulisut aningaasarsiaqartitaanerat naalackersuinikkut eqqarsaatigisariaqarparput ilumut taamak ingerlaannassasnersut? nalunnilarput tamakkua inimi maani aalajangersorneqarsinnaanngitsut. Kisianni tassa isumaqarluinnarpugut aningaasarsiaqarnikkut atukkat pitsaanerulertariaqartut, isumaginninnikkummi sulisussagut sulisinnaasullu amigaatigeqaagut, suliffimmi avatangiisit aningaasarsiallu amigartut pissutigalugit sulisorpassuit allanut suliffimmut suliaminnut naapertuutumik aningaasarsiffiginerusinnaasaminnut norartarneri assut atugaasoq malunnarluartarmat, taavalu sullinniakkagut meeqqat sulisussaarunnikkut eqqorneqartarlutik.

Meeqqat sumiginnagasut aammalu isumaginnittoqarfinni suliassat qaleriiaatinnavissut pitsaanersumik suliarineqassappata aamma sulisunut inissaqarnikkut aqqissuussinissat pinngitsoorneqarsinnaanngillat, taamaattumik isumaginnittoqarfinni meeqqerivinnilu sulisussat atorfik tunngavigalkugu inissaqartinneqartarnissaat tamakkiisumik suliarisariaqarpoq taamaaliornikkut aamma qularnanngimmat inissaqartitsigutta sulisussat ilarpassui pissarsiarisinnaagaluaratsigit.

Taamatut oqaaseqarluta inatsisartunut ilaasortaq Anthon Frederiksen Partii Naleraq apeqquteqaat aallaavigalugu oqallisissiaa oqaaseqarfigaarput.

Taavalu inatsisartut naalackersuisunut oqaaseqaatissaat tamakkiisumik taperserlugu.

Hans Enoksen